



KATILINGBAN

Ang opisyal nga pamantalaan sa Basic Ecclesial Communities (BEC) sa parokya sa Naval

Vol 2, No. 9

website: www.geocities.com/navalbec

Abril 2006



PAMALANDONG SA EBANGHELYO

Abril 2, 2006: Ikalimang Domigno sa Kwaresma
Basahon : Jer. 31:31-34 / Heb. 5: 7-9 / Jn. 12:20-33

Human sa pagbasa sa Ebanghelyo:

Unsa man nga pulong o mga pulong sa Ebanghelyo ang nakapatandog kanimo? Ngano man?

Tema: (Basahon human sa mga paambit)

Human nakita sa mga Paresio ang pagsulod ni Hesus didto sa Jerusalem, sila nag-ingnanay: "Nakita na ninyo, wala gayod kitay mahimo! Tan-awa, ang tanan misunod kaniya" (Juan 12:19). Sa gabii sa katapusang semana sa yutan-ong kinabuhi ni Hesus, ang ikaupat nga ebanghelyo mitak-op sa Basahon sa mga Ilhanan ug mibukas sa Basahon sa Himaya. Sama nga ang pag-abot sa unang mga tinun-an didto sa daplin sa Jordan nagbutyag sa sinugdanan sa pagpanghimog milagro ni Hesus (Juan 1:40-42), ang pag-abot sa mga Griyegong tinun-an nagbutyag usab sa sinugdanan sa kahimayaan ni Hesus. Dili baya sulagma kining maong hitabo. Kining mga langyaw nagtimaan hinoon sa pag-abot sa usa ka hinungdanong panahon. Miabot na ang "takna" anus-a si Hesus nga gibayaw gikan sa yuta ug gihimaya, magkabig sa tanang tawo ngadto kaniya. Usa kini ka binali nga takna anus-a mabag-o ang kahulugan sa tanang butang: ang mamatay mabuhi ug ang kawad-an makakaplag. Aron magmabungahon ang liso kinahanglan madugta kini diha sa yuta. Gikan sa maong kamatayon magasukad ang panon sa kanasuran nga gitagna nang daan diha sa Balaang Kasulatan mga mahitabo sa katapusang mga adlaw: lyahat nila ang ilang mga mata ngadto sa kahoy sa kinabuhi.

"Buot kaming makigkita kang Hesus!" Niining panahona kinsa man ang magdala kanato aron makigkita kita kang Hesus ug magkaplag diha sa iyang kamatayon sa unang mga bunga sa kahimayaan? Kinsa man ang mga tinun-an nga magsilbing tigpataliwala aron atong mailhan ang Anak sa Tawo? Ang mga "Griyego" sa atong panahon - sila nga nangitag kahulugan sa ilang kinabuhi - makakaplag pa kaha og mga higala ni Hesus nga maoy magdala kanila ngadto sa iyang presensya?

Abril 9, 2006: Domingo sa Pagpasakit aa Ginoo
(Bendita sa Lukay)
Basahon: Is. 50:4-7 / Phil. 2:6-11 / Mk. 14:1-15-47

Human sa pagbasa sa Ebanghelyo:

Unsa man nga pulong o mga pulong sa Ebanghelyo ang nakapatandog kanimo? Ngano man?

Tema: (Basahon human sa mga paambit)

Uban sa mga batang Judio, ang Simbahan miambit karong adlaw sa kadaugan ni Cristo. Misulod siya sa balaang siyudad, ang Jerusalem, aron pagtabok gikan niining kalibutan ngadto sa iyang Amahan.

Ang mga pagsaysay sa pagpasakit sa atong Ginoo nga basahon niining Domingoha sa walay duhaduha naglangkob gayod sa kinauyokan sa atong mga ebanghelyo. Adunay daghang mga pagtagad nga nag-abot libot niining yano apan mahinuklogong mga sugilanon. Nagmando sila sa paagi sa pagsaysay sa kasakitan sa atong Ginoo. Sa gihimong pagtagad aron pagpakita nga ang Kristyanismo walay kalabotan sa kalihokang malapason ug masupakon, ang mga ebanghelista mipatataw sa duruha; ang laraw mga mosangpot ngadto sa kamatayon ni Hesus og ang pagkainosente sa Manunubos nga gilansang alang sa mga makasasala. Kini sila nagmatuod usab kon giunsa niining maong kamatayon paghingpit ang

Balaang Kasulatan, ug gituman diha sa mahinungdanong hitabo sa pagpasakit ug diha sa mga taho nga nagbutyag niini, Ang makasaysayong pagsal-ot sa paglansang diha sa kasaulogan sa Pasko sa Pagsaylo mahinungdanon kaayo alang sa mga Kristyano. Ang paghalad og karnero isip sakripisyo gipulihan ni Hesus, ang sakripisyo sa bag-ong kasabutan,. Dugang pa gayud niini, ang mga ebanghelista misugyot nga si Hesus maoy sumbanan sa pagpaubos, sa pag-ampo, sa paglahutay diha sa pag-antos. Pinaagi niining mga hiyas nga naghingpit sa pagkatawhanon ni Hesus, nakakat-on gayod ang simbahan.

Ang mga pagsaysay sa pagpasakit sa atong Ginoo dili gayod makunhuran diha sa pagsugilanon lamang sa mga yugto. Tiniman-an sa kinaiya sa matag ebanghelista, sila nagpadayag og usa ka hiniusang kasaysayan diin ang pag-ataki sa dautan, nga naghatod kang Hesus ngadto sa iyang tumang pagpasakit, gihimo sa Dios nga kawang.

Pamalandongi kini:

1. Sa pagpasakit sa atong Ginoo, gibalaan niya ang tawhanong kasakit ug pag-antus. Nakaamgo ka ba niini?
2. Tungod sa pagpasakit ni Cristo, ang imong kasakit ug pag-antos nakaangkon og bili..Giunsa man nimo pagdawat ang imong kasakit ug pag-antos?

“Pasidunggi ang Ginoo pinaagi sa paghalad kaniya sa labing maayong abot sa imong yuta”

Panultihon 2:9

Abril 16, 2006: Domingo sa Pasko sa Pagkabanhaw sa Ginoo
 Basahon : Acts. 10:34a / Col. 3:1-4 / Jn. 20:1-9

Human sa pagbasa sa Ebanghelyo:

Unsa man nga pulong o mga pulong sa Ebanghelyo ang nakapatandog kanimo? Ngano man?

Tema: (Basahon human sa mga paambit)

Kon pangutan-on ang mga Kristyanos kon unsay kahulugan sa Domingo sa Pagkabanhaw, mohisgot gilayon sila sa pagkabanhaw ni Hesus. Adlaw kini sa pagsaysay sa katingalahang sugilanon. Nakita ni Maria Magdalena nga ang bato naligid na gikan sa baba sa lubnganan. Misulod si Pedro ug nakita niya ang panapton nga lino. Ug nakakita usab niini ang hinigugmang tinun-an ug mituo. Ang pagtuo sa mga magtutuo niadtong panahona nagasukad sa ilang mga pagmatuod. Mao kini ang atong kasaulogan sa kinabuhi, kay ang kamapangahason sa diosnong gugma misakmit og kadaugan gikan sa baba sa kamatayon. Ang atong mga paghandum ug mga tulumanon naghiusa kanato uban nianang hitabo nga labing makalibog, makapatingala ug makapalingkawas. Matag Domingo, ug ilabi na niining labing mahinungdanong Domingo sa tuig, misulod kita sa mga hitabo nga nagpakita nga ang Pagkabanhaw labaw pa diay sa usa ka hitabo nga sa makausa ka higayon nahitabo. Nanalangin ug nanag-ambit kita sa usa ka pagkaon nga maoy nag-umol kanato sa pagka Lawas ni Cristo. Nag-awit kitag mga “aleluya” ug nag-ingon nga ang Maayong Balita nagpakatawo lang gihapon sa atong kalibutan. Gibulokan nato ang mga itlog ug nalipay kita sa kapistahan sa walay pagkinahanglan pagsabot niini. Sayod kita nga tapos na ang tingtugnaw ug miabot



KATILINGBAN
 Ang sagid nga mensahe sa Dios: Ecclesial Communities (EC), sa parokya sa New

TEAM MINISTRY

Team Moderator: Bishop Filomeno G. Bactol, D.D.

Team Members: Fr. Marvyn A. Maceda
 Fr. Cornelio Amante, Jr
 Fr. Florencio Gerones
 Fr. Kenneth Hendricks

Newsletter Moderator:
 Fr. Marvyn A. Maceda

Encoder:
 Vinna Sabroso

Computer Specialist
 Oscar O. Borrinaga

Business Managers:
 Rizalito V. Curso
 Conchita Calvez

PARISH FORMATION TEAM

Eudoxia Canonoy	Reymund Icaín
Linda Roldan	Jonnel Quilaneta
Necitas Casado	Alfredo Olaer
Catalina Machete	Alfredo Paghubasan
Sonia Pitao	Danny Jayubo
Josephine Romero	Gualberto Tonelete
	Ramises Bongabong
	Jorge Manco
	Buddy Castro

na ang bag-ong kinabuhi. Gibag-o nato ang kinabuhi sama nga atong gibag-o ang atong panaad sa bunyag. Sa labing tukmang pagkasulti, nangangha kita atubangan Niya nga maoy nagbag-o sa kinabuhi ug maoy naghatag kahigayonan sa pagpanaad. Ang basahon gikan sa Sulat ngadto sa taga-Colosas nagpadayag og lain pang kahinungdanon niining adlaw. Tataw kaayo nga sulod niining tanang mga kasaulogan adunay gipunting nga kaugmaon. Mahimong “tinguhaon nato ang mga butang langitnon labaw kay sa mga butang yutan-on.” Ang pagkabanhaw mao ang saad sa katapusan sa panahon. Ang atong mga kasaulogan nahitabo dinhi sa makasasalang kalibutan, diha sa dili hingpit nga Simbahan. Diha kanila natagamtam nato ang panahon kanus-a kitang tanan magmahimayaon.

Pamalandongi kini:

Sa imong pagsimba matag Domingo, imo bang nasinati ang nabanhawng Ginoo?

Imo bang gitinguha ang mga butang langitnon labaw kay sa mga butang yutan-on sa imong pagkinabuhi adlaw-adlaw?

Abril 23, 2006: Ikaduhang Domingo sa Pasko sa Pagkabanhaw
Basahon: Acts. 4:32-35 / 1Jn. 5: 1:6 / **Jn. 20: 19-31**

Human sa pagbasa sa Ebanghelyo:

Unsa man nga pulong o mga pulong sa Ebanghelyo ang nakapatandog kanimo? Ngano man?

Tema: (Basahon human sa mga paambit)

“Nakita namo ang Ginoo! Nagpakita ang nabanhawng Ginoo ngadto sa iyang mga tinun-an. Galing lang wala didto si Tomas. Ngadto kanila gipakita ni Hesus ang mga samad sa iyang pagpasakit, iyang gipaambit kanila ang iyang kalinaw ug gihuypan niya sila sa Espiritu nga maoy maghingpit sa buhat sa kaluwasan pinaagi kanila. Apan si Tomas nga igo lang miambit sa maong kasinatian pinaagig taho nanginahanglan og lawasnong pagmatuod.

Matingala kita sa iyang pagbasol. Dili ba sayon ang pagdawat uban ang pagtuo. Si Tomas

nagpahinumdom lang kanato sa atong panginahanglan sa pagmatuod pinaagig hikap. Wala siya mosalig sa bisan unsang butang sa pagtuo nga dili mapamatud-an sa iyang inadlaw-adlawng kasinatian. Ang Ginoo midawat niining maong panginahanglan. Unya tapos sa walo ka adlaw, mitugot ang Ginoo sa iyang gipangayo. “Itapion ang imong mga tudlo sa akong kilid. Tuo ug ayaw na pagduhaduha!”

Kitang mga magtutuo sa ika-21 nga siglo, magpabilin ba lang gihapon nga dili matandog sa liturhikanhong kasaulogan sulod niining panahon sa Pagkabanhaw? Kontento na ba lang kita nga mosubli pag-ingon: “Bulahan kadtong motuo bisan wala makakita kanako?” Ang kang Tomas nga kasinatian kinahanglan mamahimo usab nga atong kasinatian. Kinahanglan maningkamot kita aron mamahimong mahikap ug makit-an ang gahum sa Pagkabanhaw diha sa atong kinabuhi. Tugotan nato ang gahum sa Ginoo sa pag-alim sa mga samad sa pagpanlupig. Atong pagkatingala maghimo unta kanato nga bukas ngadto sa mga sorpresa sa pagtuo. Busa mahimo kitang motuo bisan pa sa mga daw imposibleng butang ug buhaton nato ang tanan aron mamahimong buhi ang atong pagtuo. Ingon unta niini ang atong pagkinabuhi aron si Hesus mamahimong “Ginoo ko ug Dios ko” alang sa matag usa kanato.

Pamalandongi kini:

1. Kumusta na ang imong pagtuo?
2. Imo bang gihimo ang tanan aron mamahimong buhi sa kanunay ang imong pagtuo diha sa imong adlaw-adlawng pagkinabuhi?

Abril 30, 2006: Ikatolo nga Domingo na Pasko sa Pagkabanhaw
Basahon: Acts. 3:13-15, 17-19 / 1 Jn. 2: 1-5 / **Lk. 24: 35-48**

Human sa pagbasa sa Ebanghelyo:

Unsa man nga pulong o mga pulong sa Ebanghelyo ang nakapatandog kanimo? Ngano man?

Tema: (Basahon human sa mga paambit)

Si San Lucas mitaho sa usa sa mga pagpakita sa Nabanhawng Hesus ngadto sa mga apostoles (Buhat 1:3). Aron gayod sila motuo, ang Ginoo

mitugot kanila sa paghikap kaniya ug mikaon siya sa ilang atubangan. Siya gayod kadto ang Gilansang nga nabuhi pag-usab. Siya kadto nga lahi na apan mao ra gihapon. Ang kahayag sa iyang pagsaylo nagdan-ag sa Balaang Kasulatan aron mahayagan ang kagahapon ug masangyaw ang ugma: "Sa iyang ngalan, ang mensahe mahitungod sa paghinulsol ug sa pagpasaylo sa mga sala kinahanglan isangyaw ngadto sa tanang mga nasud, sugod sa Jerusalem."

"Silang tanan nagmaduhaduhaon tungod sa tumang kalipay..." Bisan karon sa atong sagad nga pagkabahin diha sa pagduda ug sa pagtuo, maglisod kita sa pag-ila diha sa pagtuo sa iyang pagkatawo, kaniya nga nagpuyo taliwala kanato. Apan ato siyang gikahibalag diha sa Eyukaristiya. Ato siyang makitan diha sa tigom nga nahugpong sa iyang ngalan. Ato siyang mabati sa mga pulong sa misaksi kaniya diha sa Balaang Kasulatan. Maila nato siya sa makausa pa diha sa pagpikaspikas sa pan. Atong masinati ang gahom sa Espiritu diha sa atong pagkapinadala ngadto sa kalibutan aron pagsangyaw ngadto sa tagsatagsa sa maayong balita. Sa pagpuyo nato matag adlaw sa atong kinabuhi, inalimahan sa pulong ug sa pan nga atong giambitan, makaila kita nga tinuod gayod nga siya nabanhaw ug nagpuyo taliwala kanato.

Pamalandongi kini:

1. Diin mo man mahibalag ang Nabanhawng Ginoo?
2. Ang iyang kabanhawan makita ba sa imong adlaw-adlawng pagkinabuhi isip Kristohanon?



BEC ACTIVITIES

Abril 2006

Abril 1, 2006 (1st Saturday):

CLUSTER FELLOWSHIP
BEC Ilaya & Smo. Rosario

April 3 (Monday)

WELCOME PARTY

Rev. Fr. Bebot Gerones &
Rev. Fr. Junjun Amante
5:00 PM - Mass (Cathedral Church)

April 23 (4th Sunday)

PAROCHIAL FELLOWSHIP
Venue: Cathedral Church

BEC ANNIVERSARY

April 1, 2006

BEC Sitio Baras

April 23, 2006

BEC Sitio Lomboy

April 27, 2006

BEC Sitio Mocalbocal

April 29, 2006

BEC Libtong Daku

NAVAL COUNTRY INN

"Your home away from home"

&

NAVAL TOWN CENTER

LJC Rice Mill & Groceries

Sitio Lupa, Calumpang Ground Floor, Naval Mall

Owned and Managed by:

RAMISES "BONG" BONGABONG